

## తిమోతిక రెగిడ్లి మొదొల్చి ఉత్తుమ్ బారిక్ జలో పవులు తిమోతిక రెగిడ్లి మొదొల్చి ఉత్తుమ్

మొదొల్ కోడు

1-2 యేసుక్రీస్తుచి రిసా అంచితె సిక సంపజా నిదానుమ్ జా అంచొ పుత్తు జలో రితో ప్రేమ తిలో తిమోతిక జో \*క్రీస్తు జలో యేసుచి రిసాచి సుబుమ్ కబుర్ కామ్ కెర్తి రిసా జోచొ బారికి జలో ఆవ్ పవులు రెగిడ్లి ఉత్తుమ్.

† సుబుమ్ కబుర్ సూనయ్యతి రిసా ఆవ్ బులుక మెన అమ్చొ రచ్చించుప కెర్తొసా జలో ‡ దేముడు, పరలోకుమ్తె అమ్ బెదితి దయిర్మ్ దిలో క్రీస్తు జలో యేసు ఆడ్ర దా అస్తి.

§ అబ్బొన్ జలో దేముడుచి అమ్చొ ప్రబు జలో క్రీస్తుచి దయ కన్కారుమ్ సేంతుమ్ తుమ్చి ఉప్పిరి తవున్!

సగుమ్జిన్ వేర కోడు సికడ్డిన్చి రిసా

3 ఆవ్ మాసిదొనియ ప్రదేసిమి గెతె తిలి పొది తుక ఆవ్ బలవంతుమ్ కెర్లిసి కిచ్చొగె జాన్సి. జా కోడు తుయి నిదానుమ్ కెరు. కిచ్చొ మెలె, “ఒత్తచ అమ్చ సంపజలనతెచ జేవ్ సగుమ్జిన్ వేర

\* **1:1-2 1:1-2** ‘క్రీస్తు’ మెలె, ‘దొర్కు జలో రచ్చించుప కెర్తొసాక తెర్రయిందె చి అంచయ్ జల మాన్యుల్క జో ఏలుప కెరెదె’ మెన ఎత్తి అదికారుమ్ తిలో దేముడు పూర్ణమ్ తెంతో సంగ తిలో. జలె, యూదుల్ తెన్ ‘క్రీస్తు’ మెలె, జో రచ్చించుప కెర్తొసాచి అర్దుమ్ తయెదె.

† **1:1-2 1:1-2** ‘సుబుమ్ కబుర్’ మెలె, యేసుక్రీస్తు ఈంజ లోకుమ్తె జా అమ్చి పాపుమ్ వయ అమ్క నయ్తాన్ ది రాజిమ్ తెంతో విడ్డల్ కెర పరలోకుమ్చి రాజిమ్తె బెదయ్లిన్చి రిసాచి కబుర్. ‡ **1:1-2 1:1-2** నెంజిలె, ‘దేముడు, పరలోకుమ్తె అమ్ బెదితి వాటు జలో క్రీస్తుయేసు; యోహాను 14:4, 6; ఆడ్ర దా అస్తి. పరలోకుమ్తె అమ్ బెదితి వాటు క్రీస్తుచి రిసా జోచి ఉప్పిరి అమ్చి దయిర్మ్ అస్సె, జొయ్యి అమ్క దొర్కు జలి దయిర్మ్.’

§ **1:1-2 1:1-2** నెంజిలె ‘అమ్క అబ్బొ జలో....’

కోడు నే సికయ్‌తి రితి తుయి ఎపెను పట్టుమ్‌తె తా జోవయింక ఆడ్ర దా కెరు” మెలయ్. ఆవ్ అన్నె దస్సి సంగితసి.

4 మాన్సుల్ కవి ఉచర్ల రితయ్ మత్తెలివో, ఉగల్‌చి ఉప్పిరి ఉగల్‌చ, పూర్గుల్‌చ నెకుమ్‌లుతె జెర్మిలసచి రిసొచ మత్తెలివోచ, కొడొచి ఉప్పిరి కొడొచ తగులు ఉచర్తె తత్తతి. జా కామ్‌క నెంజె. దసచచి రిసొ ఉచర్తె తిలె, ఆరి సత్తిమ్ నెంజిలిన్ కి ఒత్త బెద తయెదె, చి ఆరి లట్టబై తవుల, చి ముక్కిమ్‌క దేముడు దిలి కామ్‌క అడ్డు కెరెదె. జోవయించి కామ్ జర్గు కెర్తినక కిచ్చొ ముక్కిమ్ మెలె, యేసుక్రీస్తుచి ఉప్పిరిచి నముకుమీ.

5 ఈంజ ఆడ్ర అమ్ కిచ్చొక దెతసుమ్ మెలె, జేవ్ మాన్సుల్ కెర్తి రితి తగుల్ కెరయ్‌తి రితి నాయ్, గని తుమ్‌చి ఉప్పిరిచి ప్రేమయ్‌చి రిసొ. ఈంజ అమ్‌చి ప్రేమ కిచ్చొ మాయచి నెంజె. అంచి పెట్టిచి సత్తిమ్‌కయ్, ‘సత్తిమ్ కెర్తసుమ్’ మెన జాన్‌తి దయిరిమ్ జయి, చి కిచ్చొ మాయ నెంజిలి అమ్‌చి నముకుమ్‌కయ్‌చి ప్రేమయ్ ఈంజ.

6 సగుమ్‌జిన్ మాన్సుల్, వేర బుద్దుల్‌తె బెదిత కామ్‌క నెంజిల కొడొ లట్టబ్బిన్‌తె అలవాట్ జా దసితె గెచ్చు మార్పుప జా అస్సి.

7 ‘దేముడుచ ఆగ్గుల్ సికడ్డస ఆమ్’ మెనంతతి, గని జేవ్ సొంత సంగితిన్‌చి అర్దుమ్ నేన్‌తి, చి ‘ఈంజేవ్ జేవ్ కొడొచ ఆగ్గుల్‌చ అర్దుల్ ఇసి దస్సి’ మెన జేవ్ సంగిలే కి, జేవ్ అర్దుల్ జేవ్ కి నేన్‌తి.

8 దేముడు మోసె తెన్ దిలి ఆగ్గుల్‌చి అర్దుమ్ సరిగా నాయిమ్ తెన్ సికడ్డె తిలె చెంగిలి మెన అమ్ జాసుమ్.

9 గని తుమ్ ముక్కిమ్‌క కిచ్చొ ఉచర మెలె, సత్తిమ్ ఇండిత మాన్సుల్‌చి రిసొ నాయ్, గని దేముడు పూర్గుమ్ తెంతో ఆగ్గుల్ దా అస్సె మెలె, ఆగ్గుల్ తెన్ బెదితి బుద్ది నెంజిల చి సొంత ఇస్టుమ్ అయ్‌లి రితి ఇండితనచి రిసొ, దేముడుక విరోదుమ్ జలి రితి ఇండితన చి పాపుమ్ సుదల్‌చి రిసొ, దేముడుచి సుద్ది బుద్ది నెంజిలన చి జోవయింక ఆడ్డనచి రిసొ ఆగ్గుల్ దా అస్సె. అన్నె కచి రిసొ మెలె, అబ్బుదింసిక జవున్, అయ్యుఅబ్బొ అత్య కెర్తనచి రిసొ, కేన్ మాన్సుక జవున్ అత్య కెర్తనచి రిసొ,

10 లంజెబుద్ది ఇండితనచి రిసా, మున్నుబోదల్ తెన్ మున్నుబోదలి లంజెకమొ కెర్తనచి రిసా, మాన్సుల్క దెర లాబుమ్ కెరంతనచి రిసా కి, అబద్దుమ్బుద్ది ఇండితన చి అబద్దుమ్ సాచి సంగితనచి రిసా కి, మెనయ్ దేముడు ఆగ్గుల్ దా అస్సె. అన్సె, జో దేముడు సికడ్డిన్తె కిచ్చొ బుద్ది జలెకి బెదె నాయ్ గే, జా ఎత్కిచి రిసా జో ఆగ్గుల్ దా అస్సె.

11 దేముడు సికడ్డిసి కేనె ముక్కిమ్క డీస్తయ్ మెలె, అంక 'సూనవు' మెన పరలోకుమ్చి సంతోసుమ్ తిలో దేముడుచ్చి పరలోకుమ్చి ఉజిడి పరలోకుమ్చి గవురుమ్చి రిసాచి సుబుమ్ కబుర్ తెయి డీస్తయ్.

### దేముడు పవులుక దయ కెర్తన్

12 ఈంజ సుబుమ్ కబుర్ కామ్తె అంక బుకార్లో అమ్చొ ప్రబు జలో యేసుక్రీస్తుక అంచి సర్ద ఆవ్ సంగితసి. అంక 'నిదాసుమ్ కెరెదె' మెన అంక నంప కెర్లి రితి, ఆవ్ జోవయించి సేవ కెరుక ఆవ్ విలువ తిలి రితి జో దెక, అంక నిసాన ఈంజ సేవక దొర్కు జలి సెక్తి ఎత్కి జో దా అస్సె.

13 అగ్గె, జలె, జోవయింక 'దేముడు నెంజె' మెన ఆవ్ దూసుప కెర్తె తిలయ్, జోవయింక విరోదుమ్ జా జోవయించ మాన్సుల్క అల్లర్ కెర్తె తిలయ్, జోవయింక నిస్కారుమ్ దెకితె తిలయ్. గని ఆవ్ నేన కెర అన్యానుమ్ జా దస్సి కెర్లయ్, చి జోవయించి దయక జో అంక చెమించుప కెర్లన్,

14 అన్సె, అమ్చొ దేముడు ప్రబుచి ఎదివాట్ దయక యేసుక్రీస్తుక నంపజతనకయ్ దొర్కు జతి నముకుమ్ ప్రేమయ్ అంచి పెట్టి జెర్మయ్లన్.

15 కేన్ కోడుచి సత్తిమ్ కచితుమ్ జో దస్సి కెర్లిసి దెకయ్తయ్ మెలె, 'పాపుమ్ సుదల్కయ్ రచ్చించుప కెర్లి రిసాయి యేసుక్రీస్తు ఈంజ లోకుమ్తె బార్ జలన్' మెలిసి. ఆవ్ కి పూర్తి పాపుమ్చొ, ఎత్కిజిన్చి కంట ఆవ్ ఒగ్గర్ పాపుమ్చొ.

16 గని జో దేముడు కిచ్చొచి రిసా అంచి ఉప్పిరి జోవయించి దయ తిలన్ మెలె, ఆవ్ పూర్తి పాపుమ్చొ కెర్ల అల్లర్ జో ఓర్పువ జా చెమించువ కెర్తిన్ తెన్ జోవయించి ప్రేమ పూర్తి రుజ్జు జంకయ్. దస్సి, జో నిసాన్లసతె కో అంక దెకిలె, ఆమ్ కి రచ్చించువ జా పరలోకుమ్తె గెచ్చుమ్దే మెన దయిరిమ్ జా నంపజవుల.

17 ఎత్తి ఉగలు ఏలువ కెర్తొ రానొ జలో నే మొర్తొ, నే డీస్తా ఎక్కి దేముడుక ఉగల్చి ఉప్పిరి ఉగల్క పరలోకుమ్చి గవురుమ్, మరియాద కలుగు జవున్! ఆమేన్.

### తిమోతిక పవులు దిలిసి ఆడ్ర

18 తిమోతి, అంచొ పుత్తున్, కిచ్చొ ఆడ్ర తుక దెతసి మెలె, కిచ్చొ కామ్ తుచి అత్తి సొర్పు కెర దెతసి మెలె, తుక 'అంచి సుబుమ్ కబుర్ కామ్చి రిసా బుల్తు' మెన జా దీసి జోవయించ కబుర్లు సంగితనచి అత్తి దేముడు సంగిలిసి తుయి జర్గు కెరు. పాపుమ్చి ఉప్పిర్చి ఆత్మయుద్దుమ్తె జా దీన్చ జో సంగిల కొణొ తుక ఆత్మఅయ్దల్ జతు; జోవయించి సుబుమ్ కబుర్ వేర బుద్దుల్ చి ఉప్పిరి జీన్తి రితి

19 చి సత్తిమ్క నిదానుమ్ తా, పాపుమ్ నే ఇండితె, 'చెంగిల్' మెన తుయి జాన్లిసి పూర్తి మెన్సు నిదానుమ్ కెరయ్ దయిరిమ్ తెన్ ప్రబుచి కామ్ కెరు. సగుమ్జిన్, జలె, 'చెంగిల్' మెన జేవ్ జాన్లిసి నెన ముల కెర, జేవ్ అగ్గె ఒప్పున తిలి నముకుమ్ జెవ్వి పాడ్ కెరన గెల అస్తి.

20 జోవయింతె కొన్స మెలె, హుమెనైయును చి అలెక్సాండ్రు. దస్సి కెర, దేముడుచి మరియాద కడ అస్తి. 'దస్సి పాపుమ్ ముల సిక్కుతు' మెనయ్, జేవ్ సిచ్చ జతి రితి జోవయింక క్రిస్తుచి నావ్ తెన్ సయ్తాన్చి అత్తి ఆవ్ సొర్పు కెర దా అస్సి.

## 2

### దాక్వెల్లో చి రిసా సంగుమ్చ ప్రార్దన కెర్తిన్చి రిసాచి కోడు

1 తొలితొ తుక ఆవ్ కిచ్చొ మెంతసి మెలె, తుమ్ ప్రార్దన కెర్తిన్చి రిసా కిచ్చొ ఏక్ కోడు ఆవ్ బతిమాల్పు జా సంగితసి మెలె, దాకువెల్లో

ఎత్కిజిన్చి రిసా, జోవయింక కామ్క జెతిసి దొర్కు జతి రితి తుమ్ ప్రార్దనల్ కెర. జోవయింక ప్రబు తోడు తతి రితి ప్రార్దనల్ కెర, చి ప్రబు కెర్ల దయ కమొచి రిసా కి జోవయింక తుమ్చి సర్ల సంగ.

<sup>2</sup> అన్నె కిచ్చొ మెలె, దేసిమ్క ఏలుప కెర్ల అదికారుల్ ఎత్కిజిన్చి రిసా అమ్క చెంగిల్ దెకుత్ మెనయ్ తుమ్ ప్రార్దన కెర. అమ్ ఎత్కిజిన్ అల్లర్ నెంతె సేంతుమ్ తెన్ జింక జయెదె, అడ్డు నెంతె ప్రబుక బక్తి కెరుక జయెదె, చి మరియాద తెన్ జిమ్దె.

### ఎత్కిజిన్ నంపజా రచ్చించుప జతు మెన ప్రబుచి ఉద్దెసుమ్

<sup>3</sup> దస్సి ప్రార్దన కెర్లె చెంగిలి, అన్నె 'చెంగిలి' మెన అమ్చొ రచ్చించుప కెర్లొసా జలో దేముడు ఒప్పన్తయ్.

<sup>4</sup> కిచ్చొక మెలె, 'సత్తిమ్ జాన్తు! రచ్చించుప జతు' మెనయ్ మాన్సుల్ ఎత్కిజిన్చి రిసా జోవయించి ఉద్దెసుమ్.

<sup>5</sup> కిచ్చొ సత్తిమ్ జాన్తు మెన ఇస్టుమ్ జతయ్ మెలె, జో ఎక్కిలోయి దేముడు జలిసి, చి జోవయింక చి మాన్సుల్క మదెనె జతోసా ఎక్కిలోయి తిలిసి, మాన్సు జా జెర్కున్ అయ్లో రచ్చించుప కెర్లొసా జలో క్రీస్తు జలో యేసుయి. అన్నెయ్ కిచ్చొ సత్తిమ్ జేవ్ జానుక జోవయించి ఇస్టుమ్ మెలె,

<sup>6</sup> జో కెర్లి ముక్కిమ్ కామ్. మెలె, 'సయ్తాన్చి రాజిమ్ తెంతొ రచ్చించుప జతి వరుమ్ ఒండి లోకుమ్చ మాన్సుల్ సంగితి అవ్కాసుమ్ తవున్' మెనయ్ జోవయించి సొంత జివ్ దా మొర గెచ్చు, అమ్క సయ్తాన్ తెంతొ జో నెతోప గెలిసి. ఈంజయ్ కోడుచి సత్తిమ్ సరిగా సమయుమ్ దేముడు అమ్క రుజ్జు దెకయ్లో.

<sup>7</sup> దస్సి, "తుయి అంచొ బారికి జా అంచి అదికారుమ్ తెన్ యూదుల్ నెంజిల ఎత్కిజిన్క, మాన్సుల్తె గో, చి జోవయింక సుబుమ్ కబుర్ నూనవ బోదన కెరు" మెనయ్ ప్రబు అదికారుమ్ దా అంక తెద్దవ అస్సె. కో జవున్ వేర సంగిలె, తుమ్ నంప కెర నాయ్. ఆవ్ సత్తిమ్ సంగితసి.

ప్రబుక కిసి మరియు ద దెంక గే

8 ప్రార్థనల్చి రిసా జలె, అంచి ఇస్తుమ్ కిచ్చొ మెలె, తుమ్ కేన్ బెద జెతి పొది మున్సుబోదలీ ప్రార్థన కెర్తు. దేముడుక పూర్తి సత్తిమ్ తా, పెట్టి కిచ్చొ కోపుమ్ నెంతె, కిచ్చొ జట్టి జతిసి నెంతె. సుద్ది తిలి అత్తో ఉక్కుల ప్రార్థన కెర్తు.

9 దస్సి, కి, తేర్బోదలు కక్కయ్ లాజ్ నే కెర్తి రితి, బుద్ది తెన్ బడాయ్ నెంతె, చెంగిల్ బందన తంక. నెండి తెన్ బడాయ్చి పోని. బజార్ గే వెండి గే ముత్యల్ గే తియసుక పోని. బడాయ్చ పాలల్ కి పోని. మరియు ద తెన్ని తంక.

10 దేముడుక బక్తి కెర్తి కేన్ తేర్బోదక కి సూటి కెర్తిన్ కిచ్చొ ముక్కిమ్ మెలె, మాన్సుల్క కన్కారుమ్ దెకిత జేవ్చ కమె.

11 తేర్బోదల్, జలె, ప్రార్థనక బెద జెతన, తుళ్లె తా వెన కిచ్చొ గవురుమ్ నే ఉచరంతె, సూన సూన సికితె తత్తు.

12 ప్రార్థనక బెద జెతన కేన్ తేర్బోద కి బోదన కెరుక ఆవ్ ఒప్పి నాయ్, మున్సుబోదల్చి ఉప్పిరి అదికారుమ్ జేవ్ ఆనసుక ఆవ్ ఒప్పి నాయ్, తుళ్లె తంకయ్.

13 ఆదాము మెలో మున్సుబోదక దేముడు తొలితో జెర్మయ్లన్. పడ్డొకయ్ తేర్ని జలి హవ్వక జెర్మయ్లన్.

14 పడ్డొ, సయ్తాన్చి అత్తి తొలితో మోసిమ్ జలోసా ఆదాము నెంజె, హవ్వ మెలి జా తేర్బోద సయ్తాన్చి కోడు సూన పూర్తి మోసిమ్ జా గెచ్చ, దేముడుచి సెలవ్కోడు పిట్టవ తొలితో పొరపాట్ జలి.

15 ఒత్త తెంతొ, కస్టల్ నొప్పుల్ తెన్ తేర్బోదల్, బోదల్ పాయిక మెన దేముడు దా అస్సె. గని జేవ్ కస్టల్ జలెకి, కేన్ తేర్బోద ప్రబుక నంపజా నిదానుమ్ తా ప్రేమ తెన్ ఇండ, వేర బుద్దుల్ నెంతె, ప్రబుచి సుద్ది తెన్ సత్తిమ్ తెన్ ఇండెదె, జయ్యి రచ్చించుప జయెదె.

### 3

కీసా మాన్సు సంగుమ్చొ పాస్టర్ జంక

1 'ప్రబుచి కోడు' మెన ఏక్ కిచ్చొ కచితుమ్ తుమ్ దెరనుక మెలె, సంగుమ్క పాస్టర్ జంక కో ఉచర్తయ్, చెంగిల్ కామ్ ఉచర్తయ్.

2 జలె, పాస్టర్ జతోసా కీసా మాన్సు తంక మెలె, జోవయింక 'సత్తిమ్చొ మాన్సు' మెన ఎత్తిజిన్ చినితి రితి జో తంక. జోవయింక ఎక్కిలి తేర్చి తంక, \*కిచ్చొతె కి నిదానుమ్ బుద్ది ఇండితోసా జో తంక, బుద్ది నుదొ జో జంక, †జో ఇండితిన్క వేర మాన్సుల్చి మరియాద నే కడ్డొసా, వేర తెంతో జెత మాన్సుల్క మరియాద కెర్టొసా జా, జోవయింక అన్నిమ్ గే టాన్ గే దెంక, చి తెలివి తెన్ బోదన కెర్టొసా జో తంక.

3 నూర్ పితోసా, బేగి కోపుమ్ జతోసా పోని, మెత్తన మాన్సు కావలె. గగ్గొల్ జతోసా పోని, డబ్బుల్ ఆన జతోసా పోని.

4 జోవయించి సొంత గేరుక జో బుద్ది తెన్ ఏలుప కెరుక, చి జో సంగిలి కోడు జేవ్ నూన్తి రితి, జోవయించి అన్నె మాన్సుల్క జేవ్ మరియాద దెకిత్ రితి, జోవయించ బోదల్క జో సికడుక.

5 కిచ్చొక మెలె, జోవయించి సొంత గేర్క బుద్ది తెన్ ఏలుప కెరుక జో నేన్లె, దేముడుచి సంగుమ్చ మాన్సుల్క కీసి దెకెదె!

6 నొవర్క నంపజలోసా పాస్టర్ జంక బెదె నాయ్. దస్సి అదికారుమ్ నొవర్క నంపజలోసాక దిలె, గవురుమ్క పులెదె. ‡సయ్తాన్ మొదొల్క దస్సి పులిలన్, చి జో సిచ్చ జంక అస్సె. జలె, జో మాన్సు దస్సి పులిలె, జో కి జా సిచ్చ సేడుక జయెదె.

7 పాస్టర్ జతోసాక వేర మాన్సుల్ 'సత్తిమ్చొ మాన్సు' మెన చినితి రితి జో ఇండుక. నెంజిలె, †జోవయించి మరియాద గెలె, 'జిన్లయ్' మెన సయ్తాన్ సర్ల జయెదె.

### సంగుమ్చి వెల్లెల మాన్సుల్ కీన్ తంక

\* 3:2 3:2 గ్రీకు బాన చి జా కోడుతె సూరు గట్ర పితిన్ ముద్దొ కెరంతిన్చి అర్దుమ్ కి, వేర కమొ ఎత్తితె ముద్దొ కెరంతిన్చి అర్దుమ్ కి, తయెదె. † 3:2 3:2 నెంజిలె 'ప్రబుచి గవురుమ్ దెకయ్తి సుద్ది తెన్ తతోసా తంక'. ‡ 3:6 3:6 తొలితొ సయ్తాన్ దూత జా తిలన్. § 3:7 3:7 అన్నెయ్ సంగుమ్చి మరియాద కి గెచ్చెదె, ఎత్తి అదికారుమ్ తిలొ దేముడుచి మరియాద కి గెలి రితి డీసెదె.

8 సంగుమ్చి సేవ కెర్త అన్నె వెల్లో జతన కి దస్సి మరియాద ఆనన్తి సుద్ది ఇండితన తంక. కిచ్చొ మాయబుద్ది నెంజిలన జేవ్ తంక. మాయకొడొ లట్టబ్తన పోని. సూర్ నే పితోసా, డబ్బుల్ ఆన తిలన పోని.

9 జోవయించి పెట్టి కిచ్చొ మాయ నెంతె ప్రబు సికడ్డిసి, చి ప్రబుక నంప కెర్త ఎత్తిజిన్క రచ్చన దొర్కు జతయచి రిసాచి జో బార్ కెర్లి గుట్టు, పూర్తి నిదానుమ్ జేవ్ నంపజా తంక.

10 జా సేవక జోవయింక నే నిసాన్లె, జా కామ్ నే దెతె అగ్గె, జేవ్ నంపజా నిదానుమ్ తతిసి జేవ్ ఇండితిసి సరిగా పరిచ్చు జా రుజ్జు డీసుక. జోవయింక 'నిజుమి నంపజా సత్తిమ్ ఇండితతి' మెన రుజ్జు అయ్లె, జా సేవతె బెదవుక జయెదె.

11 దస్సి కి, దస్సి కామ్తె బెదిత తేర్బోదలు కి మరియాద ఆనన్తి సుద్ది ఇండితన తంక. సాండెలివో పోని. కిచ్చొతె కి నిదానుమ్ కెరన బుద్ది ఇండుతు. కిచ్చొ రగుమ్ కామ్ జేవ్ కెర్లె కి, నముకుమ్ జల మాన్సుల్ జతు.

12 జలె, జా సేవ కెర్త మున్సుబోదల్ అన్నె కీస మాన్సుల్ తంక మెలె, ఎక్కి తెర్ని తెన్ తంక, పడ్డె జోవయించ బోదల్క జోవయించి గేర్క చెంగిల్ ఏలువ కెర్తన జా తత్తు.

13 కిచ్చొక మెలె, కో దస్సు వెల్లెల మాన్సుల్ రిత జా సంగుమ్చి సేవ నముకుమ్ తెన్ నిదానుమ్ కెరుల గే, మాన్సుల్ జోవయింక గవురుమ్ దెకుల, అన్నె యేసుక్రీస్తుచి సుబుమ్ కబుర్ కామ్ జేవ్ లాజ్ నెంతె కెరుక ఒగ్గర్ దయిరిమ్ జవుల, అన్నె, జా సుబుమ్ కబుర్క 'సత్తిమ్' మెన మాన్సుల్ దయిరిమ్ జవుల.

### ప్రార్థనక బెద జెతి పొది కిసి తంక

14-15 తుమ్చితె బే బేగి గెచ్చుక అంక ఇస్టుమ్, గని 'ఏక్ వేల ఆవ్ ఆల్సిమ్ జా గెలె, ప్రబుచి కుటుంబుమ్ జల రిత సంగుమ్చి కిసి ఇండుక గే, సంగుమ్తె కిసి నిదానుమ్ తెన్ తంక గే మదెనె సిక తత్తు' మెనయ్ ఈంజేవ్ కొడొ ఆవ్ రెగిడ్డసి. ప్రబుక నంపజలన మొత్తుమ్



జీవ్ తిలో ఎక్కిలో దేముడుకయ్ కుటుంబుమ్ రితి గేర్ రితి జయెదె. జా కుటుంబుమ్క గేర్క దెకిలె, దేముడుచి బోదనచి సత్తిమ్క డిట్టుమ్ టీవడ్డి స్తంబుమ్ రితి జయెదె.

16 దేముడుచి గుట్టు కో అగ్గె నేన్లె కి, అప్పె జానయ్ జా గుట్టు కెద్ది ముక్కిమ్చి మెలె,  
 “జో ఈంజ లోకుమ్తె మాన్సు జా జెర్మున్ అయ్లన్, చి జోవయింక ‘అస్సె’ మెన మాన్సుల్క రుజ్జు అయ్లి.  
 జోవయించి ఆత్మసెక్తిక ‘నిజుమి దేముడుచో పుత్తుసి జయెదె’ మెనయ్ రుజ్జు అయ్లి.  
 పరలోకుమ్చ దూతల్ కి జోవయింక దెకితె తిల.  
 ఒండి లోకుమ్చ దేసిమ్లుతె జోవయించి రిసా సూనయ్ జతయ్.  
 ఈంజ లోకుమ్తెచ మాన్సుల్ ఒగ్గర్జిన్ జోవయింక నంపజయి అస్తి.  
 ఉక్కిల్ జా పరలోకుమ్తె వెగ గెచ్చు గవురుమ్ జయి అస్సె”  
 మెన ఒప్పన అస్సుమ్ గెద. జా నిజుమ్.

## 4

### తిమోతిక దెతి బోదన

1 దేముడుచి సుద్ది తిలి ఆత్మ కిచ్చొ ఏక్ కోడు కచితుమ్ సంగితయ్ మెలె, పడ్డొక సగుమ్జిన్ క్రిస్తుచి ఉప్పిర్చి నముకుమ్ పిట్టవన, మోసిమ్ కెర్త ఆత్మల్క చి బూతల్ సికడ్డన్క సూనుల.

2 కిసి దస్సి మోసిమ్ జవుల మెలె, కిచ్చొ చెంగిల్ గే పాపుమ్ గే చినితి సెక్తి పిట్టవన్ల మాన్సుల్ ‘సత్తిమ్’ మెన జోవయింక అబద్దుమ్ సంగుల.

3 ‘పెండ్లి జంక గారు’ మెనుల, అన్నె, కిచ్చొ కిచ్చొచి రిసా ‘జా కంక గారు’ మెన దస అబద్దుమ్చ మాన్సుల్ సికడుల; ‘సర్ద తెన్ కతు’ మెనయ్ ఎత్కి అదికారుమ్ తిలో దేముడు జెర్మవ జోవయింక నంపజా సత్తిమ్ జాన్తనక జేవ్ వస్తువల్ దా తిలె కి.

4 నాయ్, గెద, దేముడు జెర్మయ్లిసి ఎత్కి చెంగిలి, చి “తుయి దిలది” మెన సర్ద తెన్ జోవయింక ఒప్పనె, కిచ్చొయ్ కి కంక జయెదె.

5 కిచ్చొక మెలె, “కంక జయెదె” మెన దేముడు సంగిలి కోడుచి రిసా గే, పడ్డొ కతొసా జోవయింక ప్రార్దన కెర్లి రిసా కి జా వస్తువ సుద్ది అస్సె.

6 జలె, ఒత్తచ నంపజలసక తుయి ఈంజ ఎత్తి సికడ్డె, క్రీస్తు జతొ యేసుక చెంగిలో సేవ కెర్తొసా జస్తె. అన్నె, క్రీస్తుచి ఉప్పిర్చి నముకుమ్చి బోదన, సరిగచి బోదన, తుయి అప్పొక నిదానుమ్ ఇండిలి సత్తిమి తుచి పెట్టి పలితుమ్ దెరెదె.

7 మాన్సుల్ అవ్వి ఉచర్లి దేముడుక విరోదుమ్ జతిసి చి మంతిరివచ వెర్రి వెర్రి కొడొ చి జోవయించ మత్తలివొక తుక దూరి కెరు.

ప్రబుచి సేవ ఎక్కి నిదానుమ్ కెరుక పూచి తెన్ అలవాట్ కెరను.

8 కిచ్చొక మెలె, కామ్ కెర కెర ఆగ్ డిట్టుమ్ కెరంతి అలవాట్ చెంగిలి, గని ప్రబుచి సేవ కెర్తినతె \* ఆత్మక నిదానుమ్ కెరన్లె, ఆత్మకయ్ డిట్టుమ్ జలె, మాన్సుక ఒగ్గర్ చెంగిలి. కిచ్చొక మెలె, ఈంజ లోకుమ్తె కి కామ్క జెతయ్, పరలోకుమ్తె గెలె కి కామ్క జయెదె.

9 ‘ప్రబుచి కోడు, ఈంజ’ మెన కచితుమ్ దెరను.

10 కిచ్చొక మెలె, అమ్ ఆత్మక ప్రబుక పూర్తి నిదానుమ్ జా ఆత్మక డిట్టుమ్ జతి రిసా కిచ్చొక బద్దుకుమ్ నే జెతె సైమల్ కెరన్లి రితి ఒత్త అస్సుమ్ మెలె, జివ్ తిలో ఎక్కిలో దేముడుచి ఉప్పిరి అమ్చి దయిరిమ్ తియ అస్సుమ్. జొయ్యి ఎత్తిజిన్క రచ్చించుప కెర్తొసా, అన్నె ముక్కిమ్క జోవయింక నంపజలసకయ్.

11 ఈంజ బోదన ఎత్తిచ కొడొ తుయి అదికారుమ్ తెన్ సికడ్డె తా.

12 తుయి ఉబెడొ రితొ దాక్ జలెకి, తుక జేవ్ నిస్కారుమ్ నే దెకితె తుక దెక సికిత్ రితి తుయి ప్రేమ తా, ప్రబుచి ఉప్పిర్చి నముకుమ్క డిట్టుమ్ నిదానుమ్ తా, ప్రబుచి సుద్ది తా, చెంగిల్ లట్టబై తా, సత్తిమ్ ఇండితె తా. తుయి దస్సి జలె, తుక దెక జేవ్ కి సికుల.

13 అవ్ జెతె ఎదక సంగుమ్తె దేముడుచి కొడొ సదు కెర్తె తా, బుద్ది సికడ్డె తా, చి బోదన కెర్తె తా.

\* 4:8 4:8 కొరిందిల్క రెగిడ్డి ఏక్ నంబర్ ఉత్తమ్ 9:24-27 దెక.

14 పడ్డొ, జా సుట్టు, ప్రబుచి సంగుమ్చ వెల్లో మాన్సుల్చి సబతె తిలస తుక †బోడి చడ ప్రార్దన కెర్తికయ్, జోవయించ కబుర్లు సంగితో ఎక్కిలోచి అత్తి దేముడు తుచి రిసా కోడు సంగిలన్. జో దేముడు తెదోడి దిలి వరుమ్ తుయి పాడ్ కెరు నాయ్; నిదానుమ్ వాడిక కెర్తె తా.

15 జలె, తుచి పూచి తిలి ఈంజ ఎత్తి, తుయి ఎక్కి మెన్సు నిదానుమ్ కెర్తె తా, చి తుక 'ఆత్మక వడ్డ అస్సె, డిట్టుమ్ అస్సె, జోవయింక నంప కెరుక జయెదె' మెన ఎత్తిజిన్ చినుల.

16 తుయి జాగర్ద దెకను. తుయి కిచ్చొ సికడ్డె గే సరిగా ఉచర, సిక్కుడు. జా బోదన సరిగా నిదానుమ్ సికడ్డె తా. కిచ్చొక మెలె, జా సుబుమ్ కబుర్ తెయి తుచి రచ్చన కి, సూన్తనచి రచ్చన కి.

## 5

### వేర వేర మాన్సుల్క కిసి దెకుక గే సంగిలిసి

1 కేన్ జవున్ మంత్రో మాన్సుల్క కిచ్చొ జవున్ కెర తిలె సరి కెర గని, జోవయింక గోల కెర నాయ్. గని అబ్బొద్క కిసి మరియాద తెన్ సంగుక జయెదె, ప్రేమ తెన్ జో మాన్సుల్క సంగు. ఉబెడల్క 'అన్నొబావొ' మెలి రితి దెక.

2 మంత్రొవొ తేర్బోదల్క 'అయ్య' మెలి రితి దెక, ఉబెడివొక 'బేని' మెలి రితి పూర్తి సుద్ది తిలి మెన్సు తెన్ దెక.

3 మాలజ్ జా నిజుమ్ రండెల్ జల తేర్బోదల్క గవురుమ్ దెక తోడ్ కెర చెంగిల్ దెకితె తా.

4 గని, కేన్ రండెల్ మాన్సుక పుత్తర్లు జవున్, దువిసివొ జవున్, నత్తుర్నివొ జవున్, నత్తిన్నివొ జవున్ అస్తి జలె, జెద్వి ముక్కిమక జోవయించి సొంత మాన్సుల్క దెకితి పూచి కెరనుక సిక్కుతు, అయ్యసిసి పాయిలి సైమ నెతోయిలి రితి. 'దస్సి కెరుక చెంగిలి' మెన దేముడు సంగితయ్.

† 4:14 4:14 1:8, చి తిమోతిక రెగిడ్డి 2 నంబర్ ఉత్తమ్ 1:6 దెక.

5 గని కో నిజుమ్ రండెలి జా, జాక కోయి మాన్సు తోడు నెంజిలె, దేముడుక 'జొయ్యి రచ్చించుప కెర్పు' మెన, జా మాన్సు రాతి మెద్దెనె జోవయింక ప్రార్దన కెర్తె తయెదె. జో తెన్ తోడ్ నజితె తయెదె.

6 గని వేర బుద్దుల్ చి జలె, జేవ్చి ఆసల్కయ్ సుకుమ్ తెన్ జిలె కి, దస్సి జలె జితె పొది ఆత్మక మొర్లి రితి జా తయెదె.

7 జలె, రండెల్ మాన్సుల్చి మరియాద నే గెతి రితి జేవ్ జితి రిసా, ఇసి ఆడ్ర దేసు.

8 కో జలెకు జోవయించ సొంత మాన్సుల్క, అన్నె ముక్కిమ్క సొంత కుటుంబుమ్క చెంగిల్ దెకె నాయ్ గే, పోసె నాయ్ గే, జో మాన్సు ప్రబుక నే నంపజి రితి జా, నంపనెంజిలోసాచి కంట పాపుమ్చో జయెదె.

9 కేన్ రండెల్ మాన్సుచి వయసు అరవయ్ వెర్సుల్క తొక్కి నెంజిలె, జా ఎక్కిలోక పెండ్లి జా తిలిసి జలె, సంగుమ్చి సేవ కెర్తనతె జాక టీవడుక జయెదె.

10 గని జాక కిసి మాన్సు మెన ఎత్తిజిన్ జానుక మెలె, కన్కారుమ్ దెకితి మాన్సు జా తంక, జేవ్చి బోదల్క చెంగిల్ పోస తంక, వేర తెంతో అయ్ల మాన్సుల్క మరియాద కెర తతె తంక, గోత్ అయ్ల నముకుమ్ జల వెల్లెల మాన్సుల్క చట్టో దోవ తంక, బాదల్ తిలసక తోడు కెర తంక. కిచ్చో జలెకి చెంగిల కమొ కెర్తి మాన్సు జా తంక.

11 గని తొక్కి వయసుచ రండెల్ మాన్సుల్క సంగుమ్చి సేవతె తుమ్ టీవడ నాయ్. వేర ఆసల్ జా ప్రబుక పచ్చిల్ రితి జలె, అన్నె పెండ్లి జంక ఆస జవుల.

12 జేవ్ "ప్రబుచి సేవ కెర్తె తయిందె, అన్నె పెండ్లి జంక నెసి" మెన తొలితో సంగ తా, జా సేవతె బెదిలె పడ్డో అన్నె పెండ్లి జా ములిలె, అబద్దుమ్ జలి నింద సేడుల.

13 పడ్డో, రండెల్ జల ఉబెడిఒ రితసక ఎత్తి తోడు దిలె, బద్దుకుమ్ జా పేడివో పేడివో బుల బుల, సొండెల్ కొణొ సికుల. వేర మాన్సుల్చి కామ్చి నెడిమి జా జోవయించి కామ్ పిట్టవుల, నెంజిల కొణొ లట్టబుల.

14 జాకయ్, తొక్కి వయసుచ రండెలివొ అన్నె పెండ్లి బోదల్ పాయ జోవయించి గేర్ తిలిసి ఎత్కి చెంగిల్ దెకుత్, చి జోవయించి రిసా అమ్ కో సయ్తాన్చ మాన్సుల్ అమ్క నింద కెరుక వాట్ తయె నాయ్.

15 రండెల్ జల ఉబెడిబ సగుమ్జిన్ ప్రబుచి సేవ ముల దా సయ్తాన్ సికడ్డి బుద్ధితె గెచ్చ అస్తి.

### రండెల్ మాన్సుల్క కో దెకుక

16 జలె, ప్రబుక నంపజలి కేన్ మాన్సుచ మాన్సుల్తె రండెల్ మాన్సుల్ అస్తి జలె, జా నంపజలి మాన్సు జోవయింక దెకితె తవున్. జేవ్చయ్ రండెలివొక సంగుమ్ పోసుక పోని. చి ఎద్దరె తోడ్ నెంజిల రండెలివొక తోడు కెర్తె డబ్బుల్ సేనడ జోవయింకయ్ తోడ్ దెతె.

17 ప్రబుచి సంగుమ్చి సేవ కెర్తె వెల్లో మాన్సుతె కో చెంగిల్ ఏలువ కెర్తెతి, ముక్కిమ్క జోవయింతె కో నిదానుమ్ బోదన కెర్తెతి బుద్ధి సికడ్డతి, వేర వెల్లో మాన్సుల్క చి కంట జోవయింక ప్రెజల్ ఒగ్గర్ ఏలువ దెక అన్నెయ్ తోడు దెతు.

18 కిచ్చొక మెలె, దేముడుచి కోడు మోసేచి అత్తి రెగిడ్లిన్తె కిచ్చొ మెన ఏక్ టాలి ఉచరుక జయెదె మెలె,

\*“కెల్నె గిడ్డల్ దాన్ సుదయ్తె పొది సుదయ్త బెయిలల్క మూంతి బందుక నెంజె. పోన” పడ్డె, †“కామ్ కెర్తెసా జోవయించి జతమ్ నజనుక నాయిమ్” మెన సంగిలి కోడుచి అర్దుమ్ తుమ్ కెరన.

19 సంగుమ్చ వెల్లెల మాన్సుల్తె కక్క జవున్ కో జలెకు కిచ్చొ జవున్ నింద కెర తిలె, దొగుల తీగ్ల సాచుల్చి సాచి సూన్లెకయ్, జా సాచి బెదిలెకయ్, జా నింద సూన్తీ రితి విలువ దెకు.

20 గని కో సంగుమ్చ వెల్లెల మాన్సుల్ పొరపాట్ జస్తె తత్తతి గే, సంగుమ్చ ఎత్కిజిన్చి మొక్కె జోవయింక తీర్పు సంగు, చి దెక తా తిల మాన్సుల్ దస తప్పుల్ కెరుక బియుల.

\* 5:18 5:18 ద్విత్వీయాపదేశ కాండుము 25:4. † 5:18 5:18 లూకా 10:7.

21 దేముడుచి మొక్కె, యేసుక్రీస్తుచి మొక్కె, పరలోకుమ్చ దూతల్చి మొక్కె, తుక ఆవ్ ముక్కిమ్క సంగితసి మెలె, రుజ్జుల్ సరిగా నే సూన్తె తీర్పుల్ కెరు నాయ్ అన్నె కక్క మొకమాటుమ్ నే దెకితె తీర్పు కెరు.

22 పడ్డొ, బమ్మ తెన్ కక్క బోడి చడ ప్రబుచి కామ్క అదికారుమ్ దేసు నాయ్. చెంగిలో నెంజిలో మాన్సుక దస్సి అదికారుమ్ దిలె, జోవయించి పాపుమ్తె తుయి బెదిల్ రితి జయెదె. అన్నె మాన్సుల్చి పాపుమ్తె తుయి బెదు నాయ్. దసితె దెర్ను నే సేడ్తె, ప్రబుచి సుద్ది తెన్ తా.

23 పడ్డొ, సుద్ది కావలె మెన తుయి రితి పాని పితసి, కిచ్చొగె. గని అప్పె తెంతో తుచి పెట్టిచి బాద చి తుచి ఆగ్చ అన్నె బాదల్ చి రిసా ఓస్తు మెన ఇదిల్ ద్రాచ రన్నుమ్ పి.

24 జలె, తీర్పు కెర్తినచి రిసా అన్నె కిచ్చొ మెలె, బమ్మ తెన్ తీర్పు కెరు నాయ్. సగుమ్జిన్ పాపుమ్ కెర్తినె సొస్తుమ్ డీస్తయ్, చి రుజ్జు కెరుక జతయ్. గని అన్నె సగుమ్జిన్ కెర్తి పాపుమ్ లుంక తా, ఎక్కి పడ్డొకయ్ డీసెదె.

25 దస్సి కి, సత్తిమ్ కమె సొస్తుమ్ డీసుల, గని మొదొల్కయ్ నే డీసెలెకి, ఎల్లకాలుమ్ లుంకడుక నెంజె.

## 6

ఎజొమాన్లుక గొతిమాన్సుల్, గొతిమాన్సుల్క ఎజొమాన్లు కీసి దెక్కుక గే సంగిలీసి

1 కో నంపజల గొతిమాన్సుల్ జా అస్తి గే, జోవయించ ఎజొమాన్లుక గవురుమ్ దెకితె తత్తు, చి జేవ్ ఇండితి బుద్దిచి రిసా ప్రబుచి నావ్క జవున్ జోవయించి సుబుమ్ కబుర్ జవున్ కో నిస్కారుమ్ ఉచరుక నాయ్.

2 జేవ్ గొతి మాన్సుల్తె కచ ఎజొమాన్లు నంపజల జవుల గే, \* అమ్చ ఎజొమాన్లు ఆము ఎక్కి రిత జలమ్ గే మెన ఉచరుక జలెకి,

\* 6:2 6:2 తీతు 2:9-10 దెక.

జేవ్ గొతిమాన్సుల్ జోవయించ ఎజొమాన్సుక గవురుమ్ దెకుక ముల్తు నాయ్. 'జేవ్ ఎజొమాన్సు కి ప్రబుక నంపజలస' మెనయ్ జయి ప్రేమకయ్ అగ్గెచి కంట అన్నె నిదానుమ్ జోవయించి సేవ కెరుక. ఇస నిదానుమ్ బుద్దుల్ తుయి సికడు.

### డబ్బుల్ ఆసక వేర బుద్దుల్ చి రిసా సంగిలిసి

3 జలె, ప్రబు జలొ యేసుక్రీస్తుచ చెంగిల్ కెర్ల బుద్ది కొడొక చి జోవయింతెన్ బెదితి సుద్దిబోదనక కో నెస కెర వేర సికడె,

4 గవురుమ్క జాని మెననై కి, జో కిచ్చొయ్ నేనె. ప్రబుచి సర్లబుద్ది జోవయించి పెట్టి నెంజిలి రిసా, ఆరిచ కొడొచి ఉప్పిరి కొడొ తెలివి తెన్ బెదవ జుజయ్తి ఆసయి తెన్ జో మాన్సు తయెదె. కొడొ తెన్ దస్సి జుజయ్తిసి, చి దస్సిచిక జట్లు జతిసి, జలె, కిచ్చొ పలితుమ్ దెర్తయ్ మెలె, గోనల్, టంటల్లు, దూసెనల్, ఎక్కిలొచి ఉప్పిరి అన్నెక్కో అన్మానల్ జతిసి,

5 నే కుట్టిత తగులు, దసయ్ బాదల్. దసయ్ బుద్దుల్ జత మాన్సుల్చ ఆత్మల్ పాడ్ జా అస్తి, జోవయించి పెట్టి కిచ్చొయ్ సత్తిమ్ నాయ్. 'దేముడుచి కామ్ కెర్తి రితి అమ్ డీసిలె, డబ్బుల్ లాబుమ్ జయెదె' మెన ఉచర నాయ్ దేముడుచి రిసా దస తెలివి కొడొ మాన్సుల్క సికడతి.

6 నిజుమి దేముడుచి కామ్ కెర్లె లాబుమ్ తయెదె. గని డబ్బుల్చి లాబుమ్ నెంజె, అన్నె 'జో దిలిసి సాలు' మెలి రితి సేంతుమ్ అమ్చి పెట్టి తిలెకయ్ అమ్క జా లాబుమ్, ఆత్మయి రగుమ్ లాబుమ్ తయెదె.

7 'జో దిలిసి సాలు' మెలి బుద్ది తెన్ అమ్ కిచ్చొక తంక మెలె, అమ్ జెర్మ ఈంజ లోకుమ్తె కిచ్చొ ఆనుమ్ నాయ్, చి మొర్లె కచితుమ్ ఈంజ లోకుమ్ తెంతొ కిచ్చొయ్ నెము నాయ్.

8 గని అమ్క కతిసి గలంతిసి తిలె, సాలు.

9 గని ఈంజ లోకుమ్చి సొమ్సారుమ్ జంక ఆస జలస సయ్తాన్చ కమొ కెరయ్తిన్తె దెర్పు సేడ్తతి, బోనుతె సేడ్డి రితి. దస్సి ఆస తిల

మాన్యుల్ బుద్ధి నెంజిల పాడ్ కెర్త ఆసల్తె దెర్ను సేడ్తతి. దస ఆసల్ మాన్యుల్క పూర్తి పాడ్ కెర నాసెనుమ్ కెర్తతి.

10 కిచ్చొక మెలె, పాపల్ ఎత్కిక డబ్బుల్ ఆస చేరు రితి జా ఆదారుమ్ జయెదె. దస్సి ఆస జలి రిసా, సగుమ్జిన్ నంపజల ప్రబుక ముల, ఒగ్గర్ బాదల్ జా జోవయించి పాపుమ్ కతతి.

### నిదానుమ్ తా మెన తిమోతిక పవులు రెగిడ్డిసి

11 తుయి, మాత్తుమ్, దేముడుచొ మాన్సు. దస్సి పాపుమ్చి ఎత్కిక తుయి దూరి తా. కిచ్చొచి రిసా తుయి ఆస జంక మెలె, సత్తిమ్ ఇండితిసి, ప్రబుక పూర్తి నిదానుమ్ తతిసి. నముకుమ్ తతిసి, ప్రేమ, బాదల్ ఓర్పుప జతి నెక్కి, గగ్గల్ నే జతి సేంతుమ్ బుద్ధి మెత్తన బుద్ధి తతిసి, దసచకయ్ తుయి ఆస జా.

12 తుచి నముకుమ్చి బవుమానుమ్ దొర్కు జతె ఎదక తుయి పూర్తి నిదానుమ్ ప్రబుచి కామ్ కెర్తె తా. ఒగ్గర్జిన్ సాచుల్చి మొక్కె ప్రబుక తుయి నంపజలిసి తుయి ఒప్పన్లి తెంతొ, పరలోకుమ్తె గెచ్చు కెయక తెయక తా గెతి చి జోవయింతెన్ అప్పె ఇండితి వరుమ్ తుక ప్రబు దిలన్, గెద. జా వరుమ్ దెరను.

13 యేసుక్రీస్తు †పొంతి పిలాతు అదికారిచి మొక్కె సాచి సంగ ఒప్పన్లొ, గెద. జలె, ఎత్కిక జివ్ దెతో జివ్ తిలో దేముడుచి మొక్కె పడ్డొ జో క్రీస్తుచి మొక్కె

14 తుక కిచ్చొ ఆడ్ర ఆవ్ దెతసి మెలె, ప్రబు జలో అమ్చొ యేసుక్రీస్తు ఈంజ లోకుమ్తె అన్నె ఉత్త జెతి ఎదక, ప్రబుచి నుద్దిచి రుజ్జు తతి రితి, జోవయించి గవురుమ్ నే కడ్డ రిసా, ప్రబు తుక తియార్లి కామ్ తుక దిల ఆడ్రల్ ఎత్కి తుయి నిదానుమ్ కెర్తె తా.

15 యేసుప్రబు కెయక అన్నె ఉత్త జెయెదె మెలె, దేముడు అబ్బొసి కెయక జర్గు కెరెదె గే, తెదొడ్కయ్. జో దేముడు అబ్బొసి ఎత్కిచి

† 6:13 6:13 మత్తయి 27:11, మార్కు 15:2, లూకా 23:3, యోహాను 18:33-37.



కంట వెల్లో తిలో ఎక్కిలో దేముడు, రానల్క రానో జలో, ఎజోమాన్లుక ఎజోమాని జలోసా.

16 జో దేముడు అబ్బోసి ఎక్కిలో నే మొరై ఎల్లకాలుమ్ తతోసా. జో జితి పరలోకుమ్చి ఉజిడి కెద్ది మెలె, కోయి ఇదిల్ పాసి కి గెచ్చుక నెతిరి. కో మాన్సు కెయ్య కి జోవయింక దెకితి నాయ్, దెకుక నెతిర్తి. జోవయింక గవురుమ్ అదికారుమ్ కెయఁక తెయఁక తవున్! ఆమేన్.

### సొమ్సార్లుక సంగిలి కొడె

17 జలె, ఈంజ లోకుమ్చి ఆస్తి కలుగు జల సొమ్సార్లు జల నంపజలన్క తుయి కిచ్చొ ఆడ్ర దేసు మెలె, గవురుమ్ ఉచరంతు నాయ్, పడ్డె, సొమ్సారుమ్క నంప కెర్తు నాయ్. జా ఎత్తి పాడ్ జతిసి. గని దేముడుచి ఉప్పిరి జోవయించి నముకుమ్ పూర్తి తిత్తు. అమ్ మాన్సుల్ సంతోసుమ్ తెన్ వాడిక కెర్తి రితి అమ్క దొర్కు. జలిసి ఎత్తి దెతోసా జోయ్యి, గెద.

18 జేవ్ సొమ్సార్లు, జలె, కిసి తంక మెలె, అన్నె మాన్సుల్క కన్కారుమ్ దెకిత ఒగ్గర్ కమొ కెర్తు. దస్సి తిలె, ఆత్తుక సొమ్సారుమ్ జవుల. జేవ్ మున్కునే జతె, నెంజిలనక సర్ద తెన్ దర్ముమ్ తెన్ దెతు.

19 దస్సి ఇండిలె, జోవయింక కలుగు జతి ఆత్తు సొమ్సారుమ్ పడ్డెక కి జోవయింక కామ్క జెయెదె, మొర్లె పరలోకుమ్తె గెచ్చు కెయఁక తెయఁక చెంగిల్ జితి వరుమ్ ప్రబు దిలిసి జోవయింక జెయిమ్ జయెదె.

### ఆకర్ కోడు

20 ఓ తిమోతి, ప్రబు తుచి అత్తి సొర్పు కెర దిలి, జోవయించి కామ్ తుయి కెర్తి వరుమ్ దెర నాయ్, జోవయించి సత్తిమ్ సికడె తా. సుద్ది నెంజిల ఆరిక ఆరిచ కొడె, దేముడుక దస కొడె విరోదుమ్ జతతి, గెద, దస కొడెక, చి 'గ్యానుమ్' మెన గ్యానుమ్ నెంజిలిన్క, చి మాన్సుల్ కొడె జుజయ్తిన్క తుయి దూరి కెరు.

21 కిచ్చొక మెలె, 'గ్యానుమ్' మెన గ్యానుమ్ నెంజిలిన్క 'జయ్యి సత్తిమ్' మెన సగుమ్జిన్ సంగ సికడ, నంపజల సుబుమ్ కబుర్తె ముక్కిమ్ తిలిసి పిట్టవన, పొరపాట్ జా అస్తి.

ప్రబుచి దయ తుమ్చి తెన్ తవున్.

**Kupia New Testament**  
**Kupia: Kupia New Testament (New Testament)**

copyright © 2019 Wycliffe Bible Translators, Inc.

Language: (Kupia)

Contributor: SIL International (in Asia)

All rights reserved.

2020-11-18

---

PDF generated using Haiola and XeLaTeX on 1 Oct 2024 from source files  
dated 29 Jan 2022

7ccb2690-4432-5e86-88c1-f8ee976f30f4